

# ZAKON O POSTUPKU MEDIJACIJE

Službeni glasnik BiH, br. 37/04.

## I – OPĆE ODREDBE

### Član 1.

**Ovim zakonom se uređuje postupak medijacije na teritoriji Bosne i Hercegovine.**

Poslovi medijacije posebnim zakonom prenose se na udruženja ili udruženja po proceduri utvrđena tim zakonom.

### Član 2.

**Medijacija, u smislu ovog zakona, postupak je u kojem treća neutralna osoba (medijator) pomaže strankama u nastojanju da postignu obostrano prihvatljivo rješenje spora.**

Medijator ne može nametnuti strankama rješenje spora.

### Član 3.

**Postupak medijacije vodi medijator pojedinac osim ako se stranke dogovore da postupak vrši više medijatora.**

Medijator je treća neutralna osoba koja posreduje u rješavanju spora između stranaka u skladu sa principima medijacije.

### Član 4.

**Stranke u sporu mogu se sporazumjeti, prije i nakon pokretanja sudskog postupka do zaključenja glavne rasprave, da spor riješe u postupku medijacije.**

Ako stranke prije pokretanja sudskog postupka nisu pokušale riješiti spor u postupku medijacije, sudija koji vodi sudski postupak može, ako ocijeni da je to svrsishodno, na pripremnom ročištu predložiti strankama da spor pokušaju riješiti u postupku medijacije.

### Član 5.

**Stranke zajednički biraju medijatora s liste medijatora koju utvrđuje Udruženje.**

Ako se stranke ne mogu dogovoriti oko izbora medijatora, medijatora imenuje Udruženje.

Pisani akt-sporazum iz st. 1. ili akt Udruženja medijatora iz st. 2. ovog člana dostavlja se i ulaže u spis predmeta kod postupajućeg suda ukoliko je postupak medijacije pokrenut u toku ili nakon pokretanja sudskog postupka.

## II – PRINCIPI POSTUPKA MEDIJACIJE

### Član 6.

**Strane u sporu pokreću postupak medijacije i učestvuju u postizanju obostrano prihvatljivog sporazuma dobrovoljno.**

#### Član 7.

**Postupak medijacije povjerljive je prirode. Izjave stranaka iznesene u postupku medijacije ne mogu se bez odobrenja stranaka koristiti kao dokaz u bilo kojem drugom postupku.**

Medijator će informacije koje mu budu dostavljene u toku odvojenih sastanaka sa svakom strankom posebno zadržati u tajnosti i neće o njima raspravljati sa drugom stranom, ukoliko drugačije nije dogovoreno.

#### Član 8.

**Stranke u postupku medijacije imaju jednaka prava.**

#### Član 9.

**Medijator će posredovati na neutralan način, bez ikakvih predrasuda u pogledu stranaka i predmeta spora.**

### III – POSTUPAK MEDIJACIJE

#### Član 10.

**Postupak medijacije pokreće se pismenim ugovorom o medijaciji koji potpisuju stranke u sporu i medijator.**

#### Član 11.

**Ugovor o medijaciji mora sadržavati:**

- podatke o ugovornim stranama, zakonskim zastupnicima ili punomoćnicima,
- predmet medijacije (opis spora),
- izjavu o prihvaćanju načela medijacije definiranih ovim zakonom,
- mjesto održavanja medijacije,
- odredbe o troškovima postupka i
- naknadu medijatoru.

#### Član 12.

**Nakon potpisivanja ugovora o medijaciji, medijator u dogovoru sa strankama određuje vrijeme i bliže mjesto-prostoriju održavanja sastanka za medijaciju.**

#### Član 13.

**Ako je sudski postupak već u toku, stranke koje su se sporazumjele da spor riješe u postupku medijacije dužne su o tome obavijestiti sudiju koji vodi sudski postupak, dostavljanjem kopije ugovora o medijaciji.**

#### Član 14.

**Ako su stranke u toku parničnog postupka, na vlastitu inicijativu ili na prijedlog sudije, sporazumjele da spor pokušaju riješiti u postupku medijacije, sud će odgoditi ročište na period najduže 30 dana.**

#### Član 15.

**Ukoliko su stranke u sporu fizičke osobe, njihovo prisustvo postupku je obavezno.**

Interese stranaka u postupku mogu zastupati njihovi zakonski zastupnici ili punomoćnici.

Radnje u postupku medijacije, uključujući i potpisivanje sporazuma o nagodbi, koje preduzima punomoćnik, imaju isto pravno djelovanje kao da ih je preduzela sama stranka.

#### Član 16.

**Pored medijatora, stranaka, odnosno njihovih zastupnika, postupku mogu prisustvovati i treće osobe, uz saglasnost stranaka.**

Sve treće osobe koje prisustvuju postupku medijacije moraju se u pismenoj formi obavezati da će poštovati princip povjerljivosti postupka medijacije.

#### Član 17.

**Stranke moraju, blagovremeno, dostaviti medijatoru svu relevantnu dokumentaciju u vezi sa predmetom spora.**

#### Član 18.

**Na početku postupka medijacije, medijator ukratko upoznaje stranke s ciljem medijacije, postupkom koji će biti proveden i ulogom medijatora, kao i stranaka u postupku.**

#### Član 19.

**Postupak medijacije može prekinuti svaka stranka u bilo kojem trenutku u toku postupka.**

Medijator može prekinuti postupak medijacije ako ocijeni da dalje vođenje postupka nije svrsishodno.

Medijator će prekinuti postupak medijacije ako postoje ili se u toku postupka pojave razlozi koji ga sprečavaju da bude neutralan i nepristrasan.

Pisanu i usmenu izjavu stranke o prekidu medijacije, odnosno ocjenu medijatora da je dalje vođenje postupka nesvrshodno medijator će konstatirati u formi posebnog akta, potpisati i dostaviti postupajućem sudu.

#### Član 20.

**Medijator je dužan provesti postupak medijacije bez odugovlačenja.**

#### Član 21.

**U toku postupka medijacije, medijator može voditi i odvojene razgovore sa svakom strankom pojedinačno.**

#### Član 22.

**Medijator neće davati obećanja niti će garantirati određeni rezultat iz postupka medijacije.**

#### Član 23.

**Na zahtjev stranke, istaknut u odvojenom razgovoru, medijator može dati prijedlog opcija za rješavanje spora, ali ne i rješenje.**

#### Član 24.

Kada stranke u postupku medijacije iznađu rješenje spora, uz pomoć medijatora, sačinit će se pismeni sporazum o nagodbi i odmah ga potpisati.

#### Član 25.

Sporazum o nagodbi iz čl. 24. ovog zakona ima snagu izvršne isprave.

#### Član 26.

Kad je parnica u toku, stranke su dužne obavijestiti sud o ishodu postupka medijacije odmah, a najkasnije do održavanja ročišta zakazanog u skladu sa odredbom čl. 14. ovog zakona, dostavljanjem sporazuma o nagodbi.

#### Član 27.

Medijator podliježe odgovornosti za štetu koju nanese stranci svojim nezakonitim postupanjem prema općim pravilima odgovornosti za štetu, te disciplinskoj odgovornosti u skladu sa aktima Udruženja.

### IV – SUKOB INTERESA

#### Član 28.

Medijator ne može postupati u predmetima u kojima ima ili je imao, odnosno ukoliko se u međuvremenu pojavi lični interes, lični, porodični ili poslovni odnos sa strankom u sporu ili ako postoje druge okolnosti koje dovode u sumnju njegovu nepristrasnost.

#### Član 29.

Medijator može voditi postupak medijacije i u slučajevima iz čl. 28. ovog zakona, ukoliko su stranke, i nakon što su obaviještene o postojanju tih okolnosti, saglasne da on vodi postupak.

### V – USLOVI PLAĆANJA TROŠKOVA POSTUPKA MEDIJACIJE

#### Član 30.

Nagradu i naknadu troškova medijatora, u visini propisanoj aktom Udruženja kao i druge troškove neophodne za provođenje postupka medijacije, stranke snose na jednake dijelove osim ako ugovorom o medijaciji nije drugačije predviđeno.

### VI – USLOVI ZA BAVLJENJE MEDIJACIJOM

#### Član 31.

**Medijator može biti osoba koja ispunjava opće uslove za zapošljavanje.**

Pored uslova iz st. 1. ovog člana, medijator mora ispunjavati i sljedeće uslove:

- a) visoka stručna sprema,
- b) završena obuka prema programu Udruženja ili prema drugom programu obuke koji priznaje Udruženje,
- c) upis u registar medijatora koji vodi Udruženje.

Osobi koja sa uspjehom završi obuku za medijatora izdat će se odgovarajući certifikat koji služi kao osnov za upis u registar medijatora.

Član 32.

**Strani državljanin koji je ovlašten da obavlja poslove medijacije u drugoj državi može u pojedinačnim slučajevima, pod uslovom reciprociteta, voditi postupak medijacije u BiH, uz prethodnu saglasnost Ministarstva pravde i Udruženja medijatora u BiH.**

## **ZAVRŠNE ODREDBE**

Član 33.

**Ovaj zakon stupa na snagu osmog dana od dana objavljivanja u "Službenom glasniku BiH" i službenim glasilima entiteta i Brčko Distrikta BiH.**